



## KNI-mi sulerisarpunga?

**Betina Mathiasen, bygningsdesign ingeniøri,  
Sanaartugassanut immikkoortortaarfik, KNI Kiffartuussivik**



**Betina Mathiasen KNI-mi ingeniøriuvoq, sanaartormiluu immikkoortortami Kiffartuussivitsinni atorfeqarluni. Betinamita ulluinnarni sulerisarpa?**

- Projektit piareersarnissaat suliassannut pingaarnernut ilaapput. Amerlanertigut projektitsinnut titartaasartunik pappialarsornernullu suliaqartartunik siunnersuisut atortarpagut, taakkumi ta-makkununga pikkorimmata. Projektilli siunnersuisartunut apuutinnginnerini uagut KNI-mit qulaajaqqaartarparput suniarnerluta, qaqugu qanorlu. Tamannalu ajornaatsuinnaaneq ajorpoq, tas-sami sanaartormermi projekteqassagaanni sorpassuit ilaasaramik, Betina oqaluttuarpoq.

Pisiniarfimmimi nutarsaasoqartussaattillugu suliassat ataatsikkut ingerlaartussat arlaqartarput, taakkulu unamminarsinnaasarput.

Nutarsaasoqassattillugu suliamut attuumassutillit arlaqarsinnaapput. Niuertut. Nunap Immikkoortuani pisortat. IT-kkormiut. Oqartussat assigiinngitsut soorlu kommunit Nukissiorfiillu immaqa aamma ilaassapput. Ilaatigut aamma KNI-mi marketing, logistik, indkøb imaluunniit pequtinut qerititsivinnulluunniit pisiniartarfigut.



## Pikkorissiatorpugut

Betina p oqaatigaa projektit eqqarsaatigalugit suleriaatsit, soorlu projektit pitsaasut qulaajakkat pi-areeqjissaarlugit ingerlateqqittarnissaat suli pitsanngorsarnissaanut inissaqartoq.

Pikkorissiatorpugulli.

- Uagummi projektissarput pitsaanerpaamik naammassillugu avammut ingerlateqqikkutsigu, siunnersuisartut eqqoqqissaartumik sulinissaat ajornannginnerusaaq akikinnerullunilu. Qujanartumik sulianik ataqatigiissaarinissaq immikkoortortallu allat suleqatigilluarnissaat pikkoriffineruleraltuinnarparput, tassaniipporlu aamma suliffiup nuannersua; ineriartortitseqataasinnaaneq, Betina oqarpoq.

Projektit taava qanoq piareersarneqartarpat? Suliarujussuusarput, Betina p oqaatigaa. Suliarinnittussarsiunnginnermimi Betinakkut suliassaq tigoqqittarpaat naggataamik missuataaqjissallugu.

- Projektip qimerloorluataarnissaanut ulloq ilivitsoq atorsinnaasarpaa. Suna tamaat pissusissami-soorpa, kissaatigisatsit ippaa, atortussat eqqortuuppaat, ilusissaa, piffissaliussaq allarpassuillu. Tekniskimik oqaatsit titartakkallu atortaratsigit taakku pillugit Pilersuisukkormiut nassuiaakkajup-pakka. Niuertut pisortaalluunniit peqatigalugit eqqartueqatigiittarpugut, suliassamullu allannguu-tissanik kissateqarpata tusarnaarlugit, Betina oqaluttuarpoq.



*Betina Mathiasen ingeniørqatini immikkoortoqarfeqatinilu Peter Sarkov, suleqatigilluinnartarpaa.*



## Suliassat nukingernartut

Taakku saniatigut Betinakkut suliassanik nukingernartunik suliassaqtuaannarput. Amerlanertigut kissarsuutit aallarumangitsut, qerisoornerit pisiniarfinnilu tillinniarnertit siarngutigineqartarput.

Taakku engertumik suliassaapput. Taamaattoqartillugu sularinnittussat, soorlu sanasut, saaffigineqapallattarput, ilaannikkullu Betinakkut Starkimut pisiniartarput, sumiiffinnullu suliassaqarfimmut nassiuttarpaat namminneq iluarsaassinnaagaangamikkit.

- Ulloq suliffiga allanngorartarpoq, ataatsimulli isigalugu uanga suliassaraakka KNI-mi sanaartornermi projektit piareersarnissaat aqunnissaalluunniit. Ilaanni piffissara tamaat atortarpara siunnersuisartut sanasussallu attaveqatiginerannut, ullorlu alla atorsinnaavara ataatsimiinnernut, Betina oqaluttuarpoq.

Taakku saniatigut Betinakkut aamma misissuiartorlutik angalasarput, illut qanoq inneri, sanaartugassat pisiniarfinnilu atortut nutaat tikittaramikkit.



*Betina ulluinnarni suliffia; allaffimmini.*

## Projektit 50-init amerlanerusut

Anlægimi sulisut arfineq marluupput, ullumikkullu projektit ingerlasut 50-it sinneqartut Betinap akisussaaffigai.

Projektit suuppat? Sanaartugassani projektit annerit ilaat qiviarutsigit, assigiingissitaarput.

- Uanga aqutsisuuffikka qiviassagutsigit, assersuusiorsinnaavunga Tasiusami piniarnermut pisiniarfissaq nutaaq, Uummannami nærbutikkissaq nutaaq, sulisunut inissat Nuussuarmi, Uummannami Ittoqqortoormiunilu, qanittumilu Upernavimmi sulisut inaat nutaaq suliassannut ilaapput. Taakku





saniatigut Ikerasammi Kangersuatsiamilu nutarterinerit pilersarusiuleruttorpagut, Qaanaamilu sulisut inissaat qerisuusivissarlu aasamut aallartittussat, aamma pilersarusiorneqarput, Betina paasititsivoq.

### **Suliat immikkut eqqaamasat**

Betina sulinermini suliat unammillernarnerpaat eqqaavai, taakkunungalu ilaasoq aasaq manna pivoq, coronalu peqqutaavoq.

- KNI-mi sulininni unammillernartunik immikkullu eqqaamasanik ulikkaarpunga. Assersuusissaguma Qaanaami pisiniarfiup nutarsarneqarnera aasaq manna pimmat, corona peqqutaalluni Danmarkimiit atortunik isumaginnittussat tikiingitsoorput. Taamaasilluta pisiniarfimmi atortut allanngortitsinernissaannut akisussaaffik uagutsinniileriasaarpoq.

Allanngortiterinernut misilittagaqarnanga Qaanaami pisiniarfiup allanngortiternera aqutsisuuffigaara. Ataqtigiissarniarnera unammillernarsimavoq, tassami pisiniarfiup ilaa ammasussaavoq, ilaa qalipassaaq allamilu atortut nutartissapput. Atortussat sumi tamaaniipput, ataatsimoortinissaat piffissallu pilersarusiorluarnissaa, tamakku tamaasa unammillernarput pissanganarlutillu. Ullut takipput, 12 tiimimmi ullut tamangajaaviisa sulisarpugut amerlanertigullu ullup qeqqasior-nissannut ingilaarnissannut piffissaqarneq ajorpunga. Illuatungaani misigisaq nuanneqaaq, suleqatigut oqaluutikulasagut naapinnerli ajukkagut ilagalugit qanimullu suleqatigalugit nuanneqaaq, Betina oqaluttuarpoq.

Sulinerminilu qilanaarisaqarpoq.

- Kisitsinermi systemi nutaaq qilanaaraara, marloqiusamimmi sulisarnerput, tassa kisitsineq sa-naartornerlu, eqaallisarneqarsinnaangussammat, Betina naggasiivoq.

